

Is bividoris prus antiquus de s'isula.
Beniamino, Amanda e Amsìcora.





In sa localidadi de Arbus S'Omu de s'Orcu, in sa spiàgia de su Pistocu, a pagu metrus de sa bia SP 65, ant agatau unu scussòrgiu de balori stòricu mannu: is ossamentus de duus òminis e una fèmina, chi is scientziaus, imperendi su mètudu de su carbòniu-14, ant nau chi benint de su perìudu intra su Mesolìticu e su Neolìticu, est a nai intra 10.000 e 8.200 annus a oi.

Beniaminu, Amanda e Amsìcora, custus is nòminis chi ddis ant postu is archeòlogus, funt is ossamentus de is bivisoris prus antigus de sa Sardigna.



Beniamino dd'ant agatau in su 1985, po sorti, duus piciocheddus chi, gioghendi in sa spiàgia, iant scobertu s'ossamentu in su muru de arenària arruta apustis de una temporada.

Fiat cobertu de prùini de màngala arrùbia, cun acanta unu corru de mari (*Charonia lampase*) chi ddi nant puru corru de Triton, chi teniat sa punta segada, ca ddu imperànt po sonai.


Ant agatau puru arroghus de ossus de *Pròlagus Sardus*, unu mammìferu pitu chi assimbillàt a unu conillu chi is sardus si papànt, e chi est sparèssiu in su Mesuevu.



In su 2007 e su 2008 s'Universidadi de Casteddu impari a s'Universidadi de Roma ant fatu duus sgavus e ant agatau is ossus de una fèmina, e dd'ant postu **Amanda**.

In su mesi de ladàmini de su 2001, ant agatau, in un'àteru sgavu, un'àteru ossamentu de un'òmini, chi dd'ant post su nòmini de **Amsicora**.

Su nòmini arregordat sa ghia de is sardus contras a is Romanus in su de tres sèculus ananti de Gesugristu.



Dd'ant postu Amsicora poita est torrau asuta de su soli de su Pistocu apustis 9000 annus de scuriu e de mudesa asuta de terra, po si fait sciri de su connotu e de sa stòria de sa popolazioni prus Antiga de Sardigna.

Is ossus de Amsicora funt is prus antigus mai agataus in Sardigna.

PROGETU IMOI ETOTU 2



**REGIONE AUTÒNOMA
DE SARDIGNA**



**COMUNU DE
ARBUS**



**ASSÒTZIU
EUROFORM**